

## UMP anjur Hari Terbuka 9-10 Mac

UTUSAN MALAYSIA 6 Mac 2015 m/s 27 (timur)

**KUANTAN 5 Mac** - Universiti Malaysia Pahang (UMP) akan menganjurkan Hari Terbukanya bagi menyalurkan maklumat berkaitan pemilihan program bersesuaian terutama kepada lepasan Sijil Pelajaran Malaysia (SPM) dan Sijil Pelajaran Tinggi Malaysia (STPM) atau setaraf untuk mendapatkan peluang pengajian di universiti itu.

Hari Terbuka UMP itu akan diadakan selama dua hari bermula 9 Mac ini di Dewan Kompleks Sukan UMP, Kampus Gambang di sini.

—Naib Canselor UMP, Profesor Datuk Dr. Daing Nasir Ibrahim berkata, penganjuran program itu juga bagi mempromosikan sistem pengajaran dan pembelajaran yang menawarkan pelbagai program dalam bidang kejuruteraan dan teknologi bermula dari peringkat diploma, sarjana muda, sarjana serta ijazah kedoktoran.

"Penganjuran program ini diharapkan dapat dimanfaatkan sepe-

nuhnya oleh kumpulan sasaran agar berupaya membuat pilihan program yang tepat, bijak serta bersesuaian dengan kelayakan, minat dan cita-cita mereka," katanya di sini hari ini.



**DAING NASIR  
IBRAHIM**

Menurut Daing Nasir, antara pengisian menarik program tersebut adalah Pertandingan Reka Cipta dan Inovasi (Citrex) yang mengetengahkan elemen kepakaran serta kreativiti penyelidik UMP untuk dikongsi bersama masyarakat.

Malahan, kata beliau, ia juga dapat menonjolkan sistem pengajaran dan pembelajaran termasuk program pengajian di UMP terutama berkaitan program premier seperti dwijjazah dengan institusi luar negara serta melihat kemudahan makmal pengajaran dan pembelajaran menggunakan konsep kilang pengajaran.

"Selain itu, orang ramai boleh mendapatkan maklumat tentang program akademik, pembiayaan,

kemudahan disediakan, program pengajian siswazah, program pembangunan profesional dan program pengajian berterusan serta pembelajaran sepanjang hayat," katanya.

Bersempena program itu juga, kata beliau, turut diadakan Karnival Mahabbah anjuran bersama Pusat Islam dan Pembangunan Insan (Pimpin) dan Karnival Bahasa dan Kebudayaan Cina dengan sokongan Pusat Bahasa Moden serta Sains Kemanusiaan universiti itu.

"Lebih menarik, pengunjung berpeluang menyaksikan persembahan kebudayaan pelajar dari Yamaguchi University Japan yang sedang mengikuti program mobiliti di UMP selain dimeriahkan dengan acara persembahan tarian tempur dan pameran kereta kebal.

"Kami menjangkakan lebih 5,000 pengunjung sekitar Kuantan dan daerah berhampiran bakal memeriahkan program ini yang akan memberi manfaat kepada orang ramai khususnya pelajar," katanya.

Maklumat lanjut boleh menghubungi sekretariat program di talian 09-5492649/2603/2040/2464.